

দু'টি স্বরচিত ছড়া:

খন্দকার জাহিদ হাসান

(১) “বাঁশ দেবো, না বাঁশী দেবো?”

স্বঘোষিত গদ্য পদ্য স্বঘোষিত মানুষ
যেমন ইচ্ছে তেমন ওড়ায় হরেক রকম ফানুস
বাঁশ দেবো, না বাঁশী দেবো- ভেবেই না পাই কিনার,
বাঁশীই দেবো- সঙ্গে দেবো যুগলবন্দী বীণার!

অসংখ্য ফেস্ নগন্য বুক- স্বঘোষিত ফেস্‌বুক
বিশাল বিশ্ব, তবুও প্রায়ই আকাশটা তার এইটুক!
বাঁশ দেবো, না বাঁশী দেবো- ভাবতে ভাবতে ধীরে
বাঁশীই তুলে নিই দু'হাতে কখন যে পাশ ফিরে!

এলেম কালাম নেই মোটেও- স্বঘোষিত মোল্লা
বাঁশ দেবো, না বাঁশী দেবো- জানি না হে আল্লাহ!
বাঁশীই দেবো- তবুও যদি মিষ্টি একটা আয়ান
বেরিয়ে আসে সেটাই তো লাভ, জুড়িয়ে যাবে এ-প্রাণ!

নেই ডানা তাও উড়তে যে চায় স্বঘোষিত পরী
বাঁশ দেবো, না বাঁশী দেবো- জানি না গো হরি!
বাঁশীই দেবো- বাঁশীর সুরে গজায় যদি ডানা
তাতেই হবে আত্মতৃপ্তি ভরবে এ-বুকখানা!

স্বঘোষিত আকাশ-বাতাস স্বঘোষিত বিশ্ব
চিন্তার জগতে তুমি যাচ্ছ হয়ে নিঃস্ব
বাঁশ দেবো না আর আমি ভাই, বাঁশীই দেবো সদাই
বাঁশীর সুরে গাইবে সবাই, নাচবে জগাই-মাধাই।

(২) “লাগবে নাকি বন্ধু?”

একটা শুধু জীবনসঙ্গী গোরা কিংবা কালো
আর দু'চারেক সত্যিকারের বন্ধু থাকা ভালো,
হাজার লক্ষ কোটি মানুষ বন্ধু কি আর হয়?
ওটা একটা কথার কথা সঠিক কথা নয়।

মা-বাবা আর আপনজনও বন্ধু হতে পারে
বন্ধুত্বের বিস্তারিত ব্যাখ্যা অনুসারে
এই জীবনের রঙ্গমঞ্চে তোমার আমার সাথে
ছায়ার মতন তারাও থাকে সকাল বিকেল রাতে।

খেলার মাঠ বা ওয়েবসাইট কিংবা চায়ের আড্ডা
সিডনী প্যারিস দিল্লী কাবুল টঙ্গী ডেমরা বাড্ডা-
সবখানেতেই খুঁজলে তুমি 'বন্ধু' পেতে পারো
আমার সঙ্গে তুলনা ভাই কোরো না আর কারও।

এই বেলাতে একটা কথা সবাই জেনে রাখাঃ
আমার মতন ভালো বন্ধু কোথাও পাবে নাকো,
দিলদরিয়া মানুষ আমি হৃদয় ভবসিন্ধু
লাগবে নাকি কারও কোনো নিঃস্বার্থ বন্ধু?